

供養真武欲誓行符呪水救人皆承真武扶助豈孫隱之能楊扈具劄保奏運使陶汾續有奏聞朝廷看詳未言餘事祇將消遣蝗蟲鎮伏虎豹乃是靈法護為褒顯其孫隱係陰賜恩本無出身今特轉授光祿寺丞再就峨嵋縣一任其嘉州有真武慈濟觀是知州楊扈運使陶汾及市戶報恩躬立

守卿樓蟲

福州百姓林守卿實元年中因為海商至漳州海口遇風潮其船看即沉溺不覺船頭空中現一神人叫言守卿今後休更販海今敕爾一船驚危他日來閩山天慶觀尋南廊任道士相見言訖化白光不見其風濤頓息舟楫輕穩回歸福州遂入閩山天慶觀南廊詢問即無任道士房據一老道士云任字即人者王南廊有真武真君舊係人王護國殿守卿方悟詣殿禮謝因求極好沉香雕裝金縷真武一堂終身供養匠者方取沉香方圓可一尺三寸試欲斧鑿忽迸數道祥光漸漸光明不斷其功德完備守卿共約捨錢萬餘貫

於州境及閩山宮觀寺院普設大齋重新修蓋天慶觀并人王護國真武殿奉安慶儀更不令子孫販海經商當年福州春夏大旱蟲蝗飛集侵害禾苗遍祈無應直至七八月間蟲蝗不息州府訪聞林守卿家真武祈求有感率州官來迎請真武就州廳逐日三時行道執禮虔懇繞經三日蟲蝗自抱樹條而死四村人連枝折來呈驗逐日甘澤漸降遂至冬收所傷禾尚救一半州府慶謝真武啓大法醮畢准前威儀送歸守卿家堂其知州陳辭欽六錄林守卿泛海蒙救雕造聖像紅光顯現及祈求雨澤消穰蟲災於是七州十九縣普獲救濟保明詣實奏聞續准指揮其林守卿所置真武仰本州依價給換入京守卿從此進獻赴闕朝廷相驗係沉香寶座工巧外應現祥光及降福靈感實為奇異奉聖旨留納為鎮國珍寶入內殿供養林守卿特賜三班借職後來官至右侍禁年九十六無疾而終

玄天上帝啟聖錄卷之四

玄天上帝啟聖錄卷之五

消穰火德

咸平二年司天臺奏定九月初三日火星合躔婁宿正照齊國鄆州分野大生火災行下本州預宜懷謝緣鄆州係京東西路屯兵津要從四月間告示宮觀樓火道場設醮祈禱時市南李惟信充斗子牙人每夜三更潛於橋道要會之處燒香設拜一夜偶值都監任從遠出巡作犯夜收解鄆州據稱在外為不肖犯夜自正月初七日夜因知一事遂燒夜香乃問何事惟信曰昨發心將一年解得牙錢醮獻天曹答謝衣食來處作散席齋會忽有雲遊道士衣冠不整風韻飄逸手挈圖畫一軸入來求齋是絹畫真武像惟信欲求供養其道士便允祇取價錢兩貫乃就齋食至中半忽一聲風鳴不見其人但於坐卓上收得活龜一枚如桃核大惟信明知遭遇聖真顯化降授香火兼得小龜靈異因實惜供養今年正月初七夜方備下降紙禮燒獻真武又見數年前賣畫軸遺下小龜道士入門惟

信便拜欲問姓氏不說祇稱貧道能攻曆數
 算得上界火星至九月初三日正照齊地鄆
 州主火災燒至萬家如得一家姓萬不拘屋
 宇大小全門什物財寶不得移動分文先與
 抄錄見數至九月初三日天明用一火命男
 子頭分非髻身著緋衣手攜火把從正南方
 繞屋三匝以火燒之至後更無火災候畢即
 衆備上件屋宇種種等物酬還姓萬之人方
 可消穰貧道出門化白光不見惟信雖得聖
 降報說不敢申訴惟夜後從市中要處禮祝
 火星願免其災今有隨身香火爐照詣州府
 據牙人供狀看詳與近降朝旨一同遂差公
 吏緝問姓萬人家將家產什物抄札見數責
 下衆戶候火過填備文狀在案放李惟信歸
 家焚香保護既時日至裝一著緋衣童子將
 市西府橋萬明一家焚燒被南風吹駕餒起
 勢猛火分二邊人心驚駭不覺青天驟雨一
 陣火勢因息不經一時燒過萬家李惟信家
 真武座下不見小龜是時趁風雨化去鄆州
 承此靈驗已行遣次又准中書劄子為司天

臺照見九月初三日火德已臨鄆州主於寅
 時燒除萬家取問曾不侵動官物庫仗等時
 兵部侍郎參知政事吳敏古判鄆州開拆保
 奏續降指揮看詳李惟信遇真武救災以顯
 宿德宜賜法酒百瓶緇百匹米十石麩十石
 錢百貫仰於本州公使庫支請并有萬明先
 肯全家代燒尅時消穰亦給酒米例物急令
 填造屋宇財物償還不得遲滯其有國家州
 郡承此真武及南方火德尊星慈悲顯濟謹
 就在京玉津園建道場七晝夜設醮一千二
 百分位答謝

折應計都
 至和三年八月初一日夜有黃氣出南方三
 夜而沒據司天臺朝奉郎夏詢等劄子伏觀
 黃氣現於正南屬吳國分野其氣一名天門
 黃道二名土央三名計都現於磨蝎宮天門
 黃道主次年國有內憂應在陰宮一人以上
 央為墳墓之象計都是九天禍宿非時汎宮
 出現主一方軍民至冬後疾患人死四分猶
 得此星於磨蝎宮躔犯亢宿又是解災福德

之曜伏望朝廷早賜謙禳時臣僚參詳事屬
 未來合預防之謹就玉津園建內道場一月
 應名山大川並遣降御香投放龍簡建道場
 法醮各七晝夜仍頒行德音減除罪囚又於
 大內熙聖殿別致黃籙道場四十九晝夜每
 日聖駕躬幸禱祝計都星君及東方亢宿并
 家堂真武福神保求休證道場日限將畢忽
 日正午時驟起風陣汎湧黃沙龍罩目前空
 中一金甲神人現於庭際稱臣是監西天門
 葛將軍與北方真武同管陽間奏注善惡近
 見南方天門黃道開現乃是計都星君當遊
 九天七百二十年一大周宮到此過本運為
 中方土央相衝作黃氣三日躔亢宿磨蝎方
 退主陽間內憂從屬猪陰人國長而起不半
 年間荆湖江浙福建廣南淮漢路人死四分
 墳墓遍道可應其氣災雖未到奈帝德感驗
 建醮投龍等事猶未全穰惟德音一行減放
 囚獄承此種種功德感動諸天蒙真武憑此
 朝奏北極北極朝奏
 玉皇特蒙勅命天皇親往校察計都星君已

為官家禳解定下二十九歲命屬緒陰人一名新年正月初旬當死宜往正南方二十七里外衝黃道日立墳墓當為內憂救南國諸州四分軍民死亡為陛下折應計都之限至時切不得發哀為此人命限已滿元注壽數今受真武囑付特來代報官家知悉却返天門至次年正月初三日貴妃張氏棄世貴妃年二十九歲正月十九日夜時生命官屬豬候黃道利日於正南二十七里立墳墓自後更無災憂緣此應驗並賴真武降靈係助天

天降粟麥

河北兩路自真定諸州縣於建隆立軍後二載皆旱稻粟麥豆顆粒不收軍民饑疫流移轉死時磁州於七月初間據四門監守軍兵互報今有商用車乘駝馬般販到席子粟麥等各稱投官倉寄貨太守差官逐門接引其客續承都監張靜等公狀備說四門有席袋

二千粟麥並無主者看守居民盡言見西門來者卸下席子垛疊了當各牽駕車馬向崇明觀右門入去餘三處無人知其去蹤但見席角上纏黃紙馬知磁州陳庸通判莫千之等至西門崇明觀集道眾取問客人姓名道眾對曰觀門竟弊即無車從入到本觀庸等問曰此觀甚代建立多少殿宇據稱始自前唐因天曹甘真君請凡教化青提道士修學之虞後為甘真君白日上昇青提亦化去方賜為觀內有

三清殿北極七元殿甘真君殿真武靈應殿共四所殿除真武殿常積到下降日軍民施利遂旋修營外餘皆摧損庸等差撥軍脚般運席子寄著州倉四門粟麥共計一萬斛磁州民間正乏賑濟不期有此解物若從天降未敢擅糶須奏朝廷中書門下受磁州申奏又據本路真定等二十餘州申到亦有粟麥到州與磁州無異却稱元從磁州販到今將逐州數目摺合共計粟麥一十五萬餘石先下諸州疾速賤價出糶仍勸會令來進到金

錢雲馬顯是世間燒獻真武下降紙馬分明遂遣御藥齋香祝版前來磁州同知通判等就崇明觀齋醮仍於內庭建報恩真武御容殿及下河北轉運司將元糶到聖降粟麥價錢重修一路州軍真武宮觀仍改崇明觀為護國聖濟觀特賜真武殿為靈應并金字御書所是內庭修建真武御容家堂亦贈北方鎮國玄都殿額用表聖恩

田生葛茨

梓州梓潼山上清紫極觀是西晉葉華真人修鍊遇太上老君來教淨樂國王太子金闕先生成道之處淨樂太子金闕先生者即真武是也觀內有北極紫微殿是葉華真人未上昇時親為真武緣化建造皇祐元年梓州饑疫死傷十至七八忽有一村莊老兒推車賣蒸葛茨居民競來收買契者終日不饑往來貨賣經月餘人祇見從良苑門入復從舊路去吏部侍郎張昇為梓州刺史差人潛地路逐出入歸處據回報但見近梓潼山紫極觀前自然有黑霧遮接下見次日更不出來

却有人相傳從良苑門外紫極觀前計十五里路傍田地盡生葛茨應一州饑民無不掘喫救過六十來日已接新糧粟豆之類出市其田土葛茨頓絕苗穎張昇遂備香幣待詣紫極觀朝謁因入紫微殿右廂乃見青草狼藉接繞真武之堂乃令侍吏於臺座側取其草看盡是葛茨根苗再令人取却化為紙灰飛散祇有初收得連苗兩顆遂用香合封盛備述因依赴京進奏准中書回降進到真武救民應化葛茨已奉聖旨賜入四聖觀宜下梓州於街市要會處期集道東建棚街天曹大醮道場七晝夜普設大齋仍詣紫極觀真武殿別修醮祭并賜殿牌以教化救民為額

鄭箭滅龜

北京大名府天聖二年八月十四日黃河堤口壩塌頓破堤水打壞軍民辛難救塌時提轄官通判華惇臣等前去相驗壩塌基址巖穴下有一黑殼大龜兩目俱紅若或浮起其浪湍急壩索衝斷遂其中留守司後因宰相衛公韓琦守鎮北京隨行有指使鄭圭巡轄

因到堤口其龜復出為患鄭圭往看委是水怪情知容易除滅圭備朝服弓箭焚香禱告天曹一箭果中其龜仰落巖下波浪不起兵夫修壩完備至天聖三年正月三日鄭圭風涎候起卒死於解字經兩日還魂往見留守

衛公云圭被鬼使二人前來云閻羅王急喚鄭圭不合射殺黃河堤口五百年龜精今負冤來訴急要證對及檢文籍鄭圭壽祿未盡又令二鬼押去過一山下見之一皂旗隊仗紛紜圭問此是何處鬼卒曰是下界風吼囉山常有天真到此校量三界事務圭遙望隊仗問見石上坐者乃是陽間供養真武圭趨進唱若真武降言汝陽間人安得到此鬼使具述事因真武云韋閻羅行事躁急不詳真偽其龜是西蕃夢雲城死州土地昔被先朝師父陳忠元破死州城隍驅隲其神蒙天符遣往鄭都為黃河第四堤砂水土地屬北蕃卓州因在彼則別無供養遂化為妖龜隨水而上至大宋界北京黃河第七堤翻壩塌損壞軍民計一萬來口天道不容合為鄭圭一

箭射死况地府未憑天文制勅施行令符吏懷吾足前小龜同鄭圭及二鬼卒返見韋閻羅若鬼妖亂有抵對即令符吏放出小龜仍告於地府其鄭圭壽祿未終兼圭主人宰相衛公韓琦乃是紫府真人見判北京他日實登慮為不便言訖圭拜辭即隨符吏鬼使至陰府果見鐵籠罩其大龜左肋帶一箭呻吟衛究二鬼使其言真武教旨是時閻王既聞即下殿仰空頂戴遂急令檢到制勅指實虛牽情罪合加所犯墮於江海為推潮運砂四足無名水獸無形餓鬼其妖龜猶作人言要與鄭圭執對符吏於懷中取出小龜放金色光一道置於妖龜之前妖龜被光芒燦射為一塊更不轉動被聖龜挾散於虛空中化為微塵鄭圭因此還魂韓衛公為避紫府真人之號以致兵馬鈐轄王琮通判華惇臣等同狀保奏續降朝旨下北京於黃河堤口置立護國真武殿建醮立碑仍與鄭圭陞轉一資及賜衛公韓琦寶登堂額仍許隨行所至名館

裴劔驅虎

汾州橫山嘉祐年中忽有一虎早暮當路傷人繞聞官司及獵戶打捕則變為五七隻遞相抵拒况是河東入京要路為害及大因三水知縣楊宗道挈家赴任道出橫山被咬去一女申州及提轉司牒差地分巡檢等與人防護添立賞錢召人獵捕時有雲遊道士姓裴狀稱能斷此虎本州依申裴道士去稱七日又來稱此虎非是真獸乃漢時趙國諸侯張毅一家七口負楚兵殺戮於此山抹樵人見之不認乃將七副死尸收聚一處埋在橫山神廟後深僻處不曾有人踏踐因此遂成精靈又因天赦日承得瑤池玉液甘露入腹致變化為猛虎要食人血肉欲逸使怖出城看斷此妖虎時知州李庠運副邵唐提刑孫康應抽帶兵甲前往橫山坡嶺道士獨自深入忽天色昏暮風煙四起髮鬚於雲端露現裴道士披髮執劔叫云李庠等不得驚恐已驅出妖虎七隻庠等即時頂拜知是真武曾於唐則天時降應裴侍郎家誕生留此姓氏

其妖虎七隻如被繩縛俱蟠伏於地哮吼數聲而死空中復有七人拜躍告報諸官毅等乃漢朝張毅家屬遭楚兵殺戮久為精獸多傷人畜合當碎除今蒙真武將毅等從前為虎傷人性命之罪求天赦解之留此七虎身皮賞謝諸官毅等已承天恩驟去東嶽判注生道及裴道士亦於雲中隱化指揮獵戶開剝虎皮納官汾州同提轉司具奏朝廷准中書指揮宜就橫山特建真武祠堂選道士三人焚修州司月給錢米要鎮伏此地令香火不絕仍立碑記

雷殿試法

唐則天時殿前提點使南安軍觀察使賀全龍誡幼童五百習狐女邪法稱是北方七元神眾下降為全龍驅使累於殿前用法喝起妖童乘雲下雨雹放狂風則天信寵之朝臣多被全龍妄奏失寵祿者甚眾時西蕃侵叛趙弘為首纔軍陣相抵見彼雲生空中頓發火電或見龍虎群醜異狀趨逐兵馬中外奏請賀全龍用天元家童正法可用即付印投

全龍帥兵二千至境與趙弘一陣折天兵二千行法家童五百並皆傷中手足不完賀全龍回程面奏則天請罪蒙賜免過續有告急趙弘兵漸犯界則天憂慮深切忽門下侍郎裴濟奏曰臣有男仲方十六歲自三歲出言成章於九歲夜遇天神教授弓馬臣將一家賤累甘保本男將五百步兵前去勦戮妖寇趙弘遂審問仲方正賜太常寺祝仍借授光祿丞統兵前去仲方直指趙弘陣所祇用劔先累定妖兵數千獲趙弘於馬下仲方並不殺戮引帶回國奏曰趙弘妖術今被臣略施小法已擒本人見到則天退左右謂仲方曰顯卿身是北極真武寄凡顯聖也未審殿前賀全龍受七元正法所用如何仲方曰賀全龍誡家童習玄綱狐女妖法用咒語使家童各於脚底以生硃寫其邪文遂至超騰雲漢傾降雨雹其法猶不如趙弘為朝廷寵信以致諫諍臣僚無辜貶逐若不禁遏浸成大逆臣願與全龍赴殿階各進一法少釋陛下疑惑之意尋賜賀全龍同裴仲方當殿試法其

金龍乃驅妖童五百勇進馳騁兩班文武莫不觀鑿然後仲方用淨水一噴其妖童五百於空中歛跡皆攝入仲方隨身劍鞘內金龍無所措手於殿前叫云告留金龍殘喘則天急起焚香語仲方曰念金龍是國母之親幸免殺戮仲方遂放賀金龍一命其五百妖童於劍鞘中發真火焚為灰燼仲方奏告所有前後黜責臣僚仍舊復官特賜仲方神應將軍所收趙弘等仲方亦奏請放還西域

聚廳禁妖

○太平興國四年武安軍節度使尚書左僕射石光嗣移鎮洪州因聞本地性好邪法妖術雖曾禁約終不能絕切知俠道山祖聖觀有持法戒潔之士請到羅浮洞法師凌居邈來問因知洪衡潭鼎鄂一帶供養者盡是南神分差官負搜捉到習左道邪術馬用成等一百十六人當廳聚官取問據馬用成執覆本非齊學左道因為江南荆湖地水接連蠻貊常被七十二候傷魂神殺行熱疫令人作事淹滯不利惟信左道法術施刀刃油火金剛

法事驅鎮稍愈石光嗣令逐人齋出行術刀棒油鑼火燉等物並行毀納責狀踈放至當年七月洪州果有傷魂為禍居民皆患狂熱食瓦屑磁石之類或緣懸屋梁或上掛林木或赴水入溝口稱穢言光嗣召法師凌居邈普施符水救治患人盡皆較損又慮後來狂患再作乃鑲板印真武靈應聖號牌子一萬餘道俵散與人供養遇每月下降日誦真武妙經積有歲月竟絕其災從此去邪歸正石光嗣申奏洪州自南唐以前雖有官觀而真武殿宇香火至今未有三司禮部詳定合下洪州於天慶觀舊來真武殿去處專委守臣如法蓋造仍賜御書殿牌以護國感應為額石光嗣後往俠道山謁法師凌居邈受持真武法式遂求致政歸趙州治幽居簡塵崇奉真聖香火壽至九十九歲無疾而終

妖惑柴遼

眉州防禦使柴遼有弟柴遼年三十一歲為右侍禁婚娶潞王宅觀察女夫婦不睦別置寢房其柴遼忽得患疔羸醫卜皆云邪氣入

心纔見妻入房供應湯藥便生憎怨偶一夜兄遼潛往看覷聞遼房內似有婦人笑語之聲遂令家人守候天明入遼房開帳看俱無形影情知弟遼顯被妖孽迷惑再三詢問然後云二年前到聖水觀為見西廊有梁昭王堂殿壁上畫執笛神女一人容格媚態曾用手摸其面手笑謂同行人曰待尋求恁地一人為偏室此亦作戲何期此夜來謂遼曰你與我手眼來去為定因茲契合一處至今每夜二更初來五更初去見有此人欄帶上香囊一箇表照將出驗認委是異物親屬收之繼來聖水觀梁昭王堂尋見其壁委有執笛彩女容貌絕色欄抹一角彩畫消落尋將上件香囊繫依縫脉相合柴遼具析情由從登聞鼓院經由中書得達聖聰奉聖旨送開封府施行蒙府司行牒下聖水觀令燒與本觀土地驅遣其崇為患如故再行請到都道錄錢君平用法造符錄文牒并金錢雲馬同龍圖閣學士知開封府包拯親至聖水觀禱告真武將符牒望北燒之當夜柴遼房中不聞

有人語笑聲經半月其聖水觀每二更時人聞西角如牢獄行杖拷囚有婦人聲叫徹響于外忽夜於柴避門首大哭而喚柴邀言被爾誤我一身因真武受詞搜捉我去勘問送京都土地經半月凌拷喚盡無限痛楚今蒙

真武慈悲免我鐵杖之罪押往陰山為無辜女鬼三百劫限滿却還陽間神中受生今來報爾知委柴邀從此平復府尹包拯具述面奉聖旨宣柴邀引見據奏臣願受差遣積蓄俸料普設羅天大醮上酬真宰除依奏外賜玉津園內修建法醮普設大齋答謝真武護國救民之恩

魁纏安仁

復州觀察使孫漸有男安仁年十七賜三班借職授鳳州龍門鎮監稅兼巡檢到任半年形神昏耗語言顛錯公務乖疎致被州府差官替罷尋醫歸家其患不退父漸夜聞安仁房內婦人言笑不已方知是妖怪魅惑明早敦逼詢問不免說出安仁被鳳州龍門鎮侯家山土地湘花女相纏每至三更時即來直

候日出時化為塵影潛藏父漸聞此面奏御前奉宣差翰林書禁全科師巫行持法事凡經半月不能驅除再入奏進還其科遂至宰執公卿奏議孫漸家庭不曾供養鎮宅神祇却有他州山邪為禍當發心速往道觀中求

懇真武救護孫漸依稟聖旨親自寫疏詣四聖觀許願虔懇仍借真武聖幘歸家供養將滿七日一夜更初祇聞安仁房內雙聲動泣至曉安仁如大醉方蘇言語全不顛錯安仁稱自赴龍門任巡轄馬鋪夜宿侯家山驛是夜三更不覺臥牀前燈火再明帳前見一美女冠衣異俗斂袂低聲云奴非鬼怪不須驚怕與安仁是宿緣合注定於此相候奴是湘浦龍君之女因為思凡蒙東嶽降謫為管山土地人皆呼為湘花神女有半仙之分從此相慕豈忍相折今來為君父母請到真武降宅有無限天丁力士日遊神道隨從浴室檢奴若遭檢錄必受鐵杖擊斷永罰為下鬼不能得處塵寰從此棄別歸侯家山臨行灑淚就髻取下碌玉小梳一隻令安仁藏於髮

醫候奴再會欲此照證尋令取看委非凡物乃齋玉梳呈奏賜入內庫神器局收掌又奏願就于四聖觀設羅天大醮并設大齋報恩宰執等謂孫漸曰當時未信今乃果應委知供養真武之家靈應不可思議

陸傳招証

朝奉郎尚書司勳員外郎差充廣東提刑裴宗元因經韶州花蘭山得患如痞疾夜無停睡言語失次將理醫藥莫測其疾有一官負云向聞提刑到花蘭山來竊知此處並是屈死冤魂滯魄結聚於此山鐵風洞五道判官拘管在彼不少却有城下事神人獨孤立能持法調治不免喚至獨孤立纜入提刑司第二重門便云見一着綠衫官人抱屈嚙冤守索提刑性命眾官道是甚神道見此情由獨孤立又云竊念立本是儒生昨遇真武真君憫立寒賤心慕道緣不虧孝義化為賣藥道人為立用藥點眼兼得文字一紙却是驅禁之術從此用藥救人無不靈驗獨孤立前設香案以時花露水妙香供養真武結下壇戒

用黃羅一丈二尺以生硃書篆上清符籙望
 此呪勒焚香隨紙燒化劄下劍器上掛五方
 符吏六丁直壇法帶四十九事地輪四十九
 梳燈檢校司判官筆硯等呪誦揚枝淨水啓
 請真武降靈呪遣直符齋持表信昇天通報
 持法既了囑付提刑宅眷如遇真武降臨不
 得驚恐至第三日忽遇聖降從裏面撮出妮
 子來真武案前附語云是棟州司法陸傳因
 為裴宗元是本州通判緣與先父少卿有隙
 却將傳報讎計會祇應弟子夢誣於國忌日
 行藥有濫攝傳下獄非理鞠勘令招承違逆
 罪犯凌逼負屈身死傳為本壽未滿合牒花
 蘭山鐵風洞收管無由冤訴何期裴宗元來
 遊此山遇傳冤魂遂纏繞至今秋緣裴宗元
 祿壽方盛未獲便害其命今值真武福神降
 宅搜追邪疾憫傳枉亡更不遣去鐵風洞就
 此用法水洗滌冤魂仰承真武授記令陸傳
 面東朝禮

本師金闕玄元帝師太上老君畢再託陰於
 富貴之家為男兒身亦服官職仍遣符吏齋

持符命前去花蘭山鐵風洞計會所屬勾繫
 枉死鬼名自後更無親對所附妮子即覺裴
 宗元當即平復將家中金銀錢物就廣州天
 慶觀修懺罪謝恩醮七晝夜并齋官觀道士
 及謝獨孤立保明申奏朝廷續降聖旨獨孤
 立可賜本州助教裴宗元從此修奉香火終
 身不替

王虎中計

朝請大夫兵部郎中知潞州充兵馬都總管
 錢延年劄子伏為潞州通判職方郎中姚孜
 不時在假或時發狂若與人交爭鼻口出血
 日夜不睡至平復審問又自不知但云如被
 執縛於林野之間有人理會性命事三年醫
 者皆調理不退後因轉運使陳寬說及東京
 五嶽觀道士宋之才用符法呪水治之宋之
 才見充右街道錄入內備宣召難以擅請不
 免具錄姚孜事由申奏朝廷蒙宣借宋之才
 法師到潞州姚孜宅遂令宅內設香案先燒
 符牒遣功曹持吏齋入天門報覆真武願賜
 威光下赴祈禱之處然後將帶到真武像

鋪設淨水法物供養正值五月五日焚香守
 備真武降臨令一書吏用紙筆伺候附口寫
 錄約是酉時見姚孜披髮從卧房大叫一聲
 奔走出來香案下跪膝通傳云本舒州桐城
 縣主簿王虎慶曆初年姚孜為太湖令因受
 差同往大雲倉般量上供米麥姚孜却受專
 監金銀計屬虛擡欠折正數小麥八十石時
 王虎不知祇隨情於赤曆日同蒼押申本州
 并轉運司訖後來姚孜先知事發從太湖差
 人來送書并人事黑漆琴光鐵索六隻遂問
 來人索書却稱渡江遭浪損壞及將信物看
 驗委是水浸浪迹其書浸壞不任開覽來人
 告覆且留下索子客急回太湖別換書來請
 領回文虎不知是計從此留下自後不見換
 書人到幕被壽州勘院准勅前來追攝入獄
 鞫勘與姚孜等對認同情受過大雲倉般量
 專監金銀遂往王虎家取到姚孜人事索子
 六隻洗刷辨認一隻是金五隻是銀王虎在
 獄方知陰中姚孜之計無由分辨因而氣塞
 衝心不明身死被姚孜推逃亡王虎承當却

全出姚汝罪犯陽間祇謂王虎身亡照證無憑奈為東嶽陰府祿壽簿上不注王虎枉死不當收管祇在塵劫無由解脫三年前於潞州夾岸遇見冤家姚汝相纏至今須要同往東嶽執對幸遇真武今日下降已荷授記為虎解脫冤魂得與姚汝相離蒙給賜照證文字往陰府注生從今更無讎執姚汝良久甦醒延年等具奏朝廷姚汝遂罷官歸湖州拾錢二千貫入舒州靈仙觀添蓋真武閣

陳妻附魂

淳化二年六月二十一日東頭供奉官閣門祇候秦中立受差秦鳳路提點軍器秦中立一生侍奉真武不違寅夕香火中立既受差遣將綺彩畫真武幘軸隨身到京兆府家見判府陳儼言有子景仁見年二十四歲曾婚張氏方一年張氏染瘵疾死景仁傳染其患時似顛狂或喜或悲自歌自語有時聞得與其妻往來房內鬼哭神言敲打驚響遍求醫禁略無效驗中立曰今且歸驛當為齋心明晨來看中立夜就館驛焚香掛隨身真武供

養先具誠懇奏知次日天明中立遂親手擎幘步趨入府堂將真武幘像就陳景仁房室前淨設供養令陳儼合家虔誠捻香祈禱然後中立手攜香爐入房看觀問景仁年幾幾生月受病時日因依錄奏狀一通當日於真武前用符吏紙馬燒奏至第四日中立在館舍內夜至四更聞人叩門云念奴是京城故侍郎張昇孫女因嫁陳景仁為妻未滿一年染却勞氣沉頓著牀被醫人將作血隔調理誤投湯藥枉壞性命因此孤魂不收遊颺塵中日夜銜冤忽因景仁前三月間出城遊獵得與附託魂魄在身免在荒野遭界分土地驅逐今閣使帶真武入宅對定景仁房供養奴被聖威逼逐無處潛藏蒙真武慈德差使丁神搜奴魂魄面見尊神憫奴冤枉賜以楊枝淨水洗滌身魂仍得授記解釋冤債更不歷轉陰司今得託生鼎來羅宗傳太尉家依前為女身特來報謝而去中立逐一記錄往見陳儼其陳景仁遂已痊復如故陳儼表奏事因甘退三資本職并男景仁覃恩誥勅保明

舉轉秦中立出官除授東上閣門使雄州防禦使及男景仁本授太廟室長並不追降陳儼施財五千貫蓋造上清紫極宮真武立身功德殿奏請勅額續奉聖旨特賜通靈普慈之殿為額

王氏懷鬼

舒州金部員外郎王堯年有女年三十一歲肚懷鬼胎二年求醫皆莫能治不惟父母憂慮其女常自疑惑欲往後園自縊空中聞人叫云不得亂棄性命是汝五百年宿債何不去告宅神女子回顧又無一人遂歸家說與母所謂宅神者本家祇有真武別無聖像乃請靈仙觀法師陳居巽就家堂結壇戒遣發符使特詣天曹懇求聖降願為王氏消除宿業免其胎腹合家虔誠守候法師報應時十月二十一日午時忽有梳口大小紅光暈遍散屋外盤旋壇前遂降附王氏而言前生曾與藥婆貨毒藥與人打取胎孕內有貴命寄胎遭其所毒又復沉墜卒無出期此罪當永劫罰為恒沙毒蛇汝緣有此一世人身又

遇有殺冤家在於腹中飲食血肉脹塞心胸欲害其命因後園取死之際遇吾隊伏今有香火感吾下降吾當為汝永除此冤更無執對於今夜二更一點就汝卧牀前地點輪燈七七四十九梳替代一身用名香淨水紙馬供養至四更盡就彼呼女子小字年月日時連替代金紙燒與前生冤魂其胎不過月日自然消散居異禮謝紅光漸散乃知真武回馭堯年燒奏了畢立下疏契候女子胎患消散願將此宅并後園捨為真武降聖行宮其女果應月日平安於外有人傳播王金部女子遇真武救濟其身必貴堯年見授襄州通判遷改新宅纔辦承舒州太守謝方平為次男景祥議親遂納禮成結堯年面將宅并園興蓋殿宇計會舒州及監司等處保奏朝廷頒賜名額准中書劄子取問王堯年所捨園宅為宮一力難圓又奉聖旨國為添造三清寶殿并北極七元殿仍賜降真慈救觀為額

玄天上帝啓聖錄卷之五

玄天上帝啓聖錄卷之六

流六

奏錄延壽

仁宗皇帝於至和二年染患不豫據三司禮部校定到南嶽嵩陽觀法師王伯初劄子欲上奏北極審其壽曆須是遇庚申日皇帝御札奏章於是夜戌時躬親祈懇於星斗之下來早伯初必知奏章細因後至庚申日皇帝令宮儀副紙筆代寫奏錄至戌時露天燒化次早宣問伯初却云夜來不曾有奏錄到天界恐皇帝不曾親札奏章不專以致難達天關乃用舊書至誠御札奏錄於是夜懇禱燒奏次早伯初纔宣喚便稱慶賀臣已見夜來章奏傳到

北極中天大帝殿下披閱見送真武佑聖院保明更俟七日終獲是驗伯初親見奏章紙共七幅從頭暗念並無一字異同聖意喜悅至七日伯初復見屏退左右奏皇帝臣適在牛女宮銜接聖仗已蒙真武保明仁德合展聖壽一紀之數回至西天門見葛將軍仲重望皇帝不可忘之緣此聖候平復賜王伯初

充在京兩街都道錄住持五嶽觀賜紫乾元洞神法師因而聖意恩慕真武垂恩顯應事迹非常再行催促監當官疾速連換內庭家堂殿閣仍令三司禮部關報合屬去處搜尋真武事迹保奏檢類施行所有延壽感應事

兼西天門葛將軍係皇帝留恩之故今就真武殿右畔亦蓋報恩殿焚修香火

施經救災

南京應天府有上清鴻福宮係太祖興隆建極報天啓聖功德第一處兼大中祥符中真宗東封曾宿是宮夜遇北方真武降現云為官家護駕蒙真宗特賜真武立身金相寶閣及賜御書金字牌至和中冬月軍民瘟疫於鴻福宮興建道場未獲感應人皆惶惑忽夜真武託夢與住持道士任亢之云吾觀南京冬疫宜令印造太上說真武妙經沿門施與患人供養受持任亢之既受聖夢即以散之患者並安適值朝廷有征南事抽差兵馬人數無闕其留守司參政諫議大夫沈立具奏朝廷准中書劄降看詳鴻福宮於前朝因顯